

5 produk inovasi Mardi mampu pacu ekosistem agromakanan negara

BERNAMA



Ahmad (tengah) bersama Ketua Setiausaha Kementerian Pertanian dan Industri Makanan Datuk Haslina Abdul Hamid (kiri) dan Ketua Pengarah Mardi Datuk Dr Mohamad Zabawi Abdul Ghani (kanan) melancarkan Produk Inovasi Mardi. FOTO Bernama

Serdang: Institut Penyelidikan dan Kemajuan Pertanian Malaysia (Mardi) hari ini melancarkan lima produk inovasi terbaharu yang sedia dikomersialkan dalam usaha memajukan industri agromakanan negara.

Produk yang dilancarkan sempena Hari Inovasi Mardi 2022 hari ini ialah Kit diagnostik penyakit padi FlocTest, Formulasi nano-bakterisida XanthoZIDE, Bar Enduran Pembebasan Tenaga Berkala, Kandi Tenaga dan Teknologi Minuman Pemulihan Sukan.

Timbalan Menteri Pertanian dan Industri Makanan Datuk Seri Ahmad Hamzah berkata inovasi melalui pendekatan moden dan pertanian pintar merupakan pengubah keadaan utama dalam mentransformasikan sektor agromakanan negara.

Beliau berkata pendekatan tersebut boleh memacu ekosistem agromakanan negara menjadi lebih mampan dan berdaya tahan sekali gus dapat mengatasi beberapa isu yang menjejaskan rantai bekalan makanan seperti kenaikan kos bahan makanan ternakan yang dihadapi negara sejak kebelakangan ini.

"Saya berharap inovasi berasaskan sains dan teknologi dapat memberikan faktor 'wow' serta menarik minat golongan muda untuk turut menyumbang dalam agenda pemodenan sektor agromakanan," katanya pada majlis pelancaran itu di sini, hari ini.

Ahmad berkata, usaha untuk memperkukuh sekuriti makanan negara merupakan proses berterusan dan memerlukan kerjasama daripada semua pihak dalam menjayakannya.

"Usaha sama dan kolaborasi strategik yang utuh amat diperlukan daripada semua pihak termasuk agensi persekutuan, kerajaan negeri, pertubuhan bukan kerajaan (NGO) dan kumpulan barisan hadapan terdiri daripada petani, penternak dan nelayan,

"Adalah menjadi harapan saya ia dapat dimanfaatkan selari dengan matlamat menjamin sekuriti makanan negara dan memastikan Keluarga Malaysia memperoleh bekalan makanan yang mencukupi dan selamat pada harga yang berpatutan," katanya.

Beliau turut merakamkan ucapan tahniah kepada Mardi kerana Hari Inovasi Mardi hari ini yang bertemakan 'Penyelidikan dan Pembangunan Memperkasakan Sekuriti Makanan' berjaya menampilkan hasil kajian berinovatif yang selari dengan tugas agensi itu sebagai institusi penyelidikan agromakanan utama Kementerian Pertanian dan Industri Makanan.

"Hari Inovasi Mardi yang diadakan setiap tahun menunjukkan komitmen berterusan pihak pengurusan institut bagi menyemai serta memperkasakan budaya inovasi dan kreativiti," katanya.

Disiarkan pada: Oktober 18, 2022 @ 4:26pm
